

今次係我第 1 次做組長，難免都會有少少緊張，驚會唔會有好多野自己唔識做。但係好彩係今次龍崗之旅中有好多家長樂意幫我同包容我所以我可以更容易同更快做完我要做嘅野。

第 1 日，我早咗差唔多半個鐘到天循小，隻眼同條線差唔多大嘅我忙於認人，亦都想睇下我同房嘅妹妹其實係邊個，因為相同真人個樣好唔同。後來幾經辛苦終於搵到同我同房嘅妹妹，望下望佢個樣發現，都幾大個喎唔係想像中小二、小三嘅妹妹，但係原來伊晴都細我唔少，佢只係一個 10 歲嘅小五生。之後過境巴嚟到，個個都好匆忙嘅跑上車，希望坐到一个舒服嘅位置。經過差唔多半個鐘嘅時間，我地到咗深圳灣口岸，原本係門口睇唔係好多人應該好快可以過到關。點知，一入到去只係見到一個個人頭企係我地面前，到咗中國入境個邊仲要實施人流管制，可想而知有幾咁多人，再過多一個鐘，終於過到中國關口。上到大陸大巴之後我地向明輝工廠出發，我地比本身預計嘅到達時間做咗好多到，所以我哋唔等 A 車嘅人，早啲去食午餐，亦都有幸可以食大陸工人食嘅咩午餐。佢哋唔差其實都有幾多餸可以擇，不過全部都偏向肥膩。食完飯後 A 車都未到，所以我哋先去咗永輝嘅酒店用品部。我見識到好多野，而我覺得最特別嘅係一個真嘅多士爐上竟然擺咗啲假嘅麵包，但係多士爐竟然插咗電掣，會唔會燒咗啲假嘅麵包，甚至成座大廈。之後終於開始咗我哋嘅彩排，好彩當時係下晝兩點幾，太陽開始去西邊，而西邊有工廠幫你擋住太陽，令我哋同樂器冇咁熱。到咗夜晚，我地去職員餐廳食飯，亦都第 1 次 7 個人食 9 餸 1 湯。食到好飽嘅我地終於上車去酒店。酒店比我想像中豪華同大，又有梳化又有茶几，最搞笑係有個透明玻璃擋住嘅廁所同沖涼房。最估唔到係大陸電視機然後翡翠台同埋卡通片台睇，我同伊晴睇咗好一段時間先訓覺。

第 2 日，我地 9 點鐘開車出發去明輝工廠總綵排同埋準備表演。總綵排前，我地以為有好大密雲遮住太陽應該唔會太熱同大曬，點知開始嘅時候竟然舊密雲走咗，我地要係陽光下綵排，好彩蕭生好好人，比我地只係綵排大約 1 個鐘，如果唔係樂器就會走曬音。由於我地早咗完綵排，我地去咗明輝嘅七彩店買野。我地有 50 蚊優惠券，可以買咩都得，我地買住何野都可以用員工價。買完想買嘅野之後，我地返去明輝工廠職員餐廳食午餐。食完午餐後慢慢行去出去表演場地準備，出到表演場地後竟然見到有差唔多二千張櫈擺係空地上面比嘉賓同觀眾坐，未見過大場合嘅我突然之間覺得有啲驚。表演好快開始嘅時候，我見到觀眾開始慢慢入座，原來入場睇嘅觀眾全部都係明輝工人同埋佢地嘅家人。終於到表演嘅時間，緊張感開始降低，專心做好表演。表演完咗我地返去休息室收拾我嘅樂器等等嘅野後又去職員餐廳食飯，嗰個晚餐明顯地冇之前嗰兩餐咁辣比較易入口。返到酒店後，又睇咗好耐電視先訓。

第 3 日，亦都係最後一日，我去參觀嘅油畫村同埋油畫博物館。油畫村同我想像中好大出入，我以為油畫村好多唔同嘅油畫睇，點知原來係一條好似油畫嘅村落，令到我有啲失望。不過油畫村入面有不同嘅小食店比人醫肚同埋有幾靚嘅油菜花田睇，都覺得油畫村值得去下。之後我地去油畫博物館，博物館入面終於有唔同嘅油畫睇，仲有得試印圖章。雖然我有白紙然後搵張紙巾印，但係我覺得我印得都可以接受。行完油畫博物館後，我地去咗一個咁大型嘅商場叫 MH Mall 嘅其中一間餐廳食燒肉。嗰間餐廳嘅職員係咁擺住唔同嘅燒肉周圍走，問我地要唔要。當佢哋知道我地係由香港嚟之後，用啲好難聽得明嘅廣東話招呼我地。由於我哋唔明佢講咩，我地只可以答佢：「嗯、哦、好」等簡單而佢又聽得明嘅詞語，結果我哋擺咗好多燒肉而我地一定唔會食得

曬。食完野之後我去咗一個大型超級市場買野返香港當手信。我地係差唔多 2：30 上車準備返天水圍，完結今次嘅龍崗之旅。

係今次嘅龍崗之旅中我識到好多新朋友，尤其係同房嘅伊晴，平時見佢完全唔笑嘅樣都幾恐怖，但係喺今次嘅旅程中發現佢都好鍾意笑同講野。好想係呢度多謝基金比我去一個咁難忘嘅旅程，令我學同體驗到好多新奇有趣嘅野。

鄧心玥